

L'urden dals premonstratens e ses operar en il Grischun

■ L'urden dals premonstratens è vegni fundà il 1120 da s. Norbert a Prémontré sper Laon (Picardie). L'urden, obligà a las reglas da s. Augustin, sa deditgava al predegiar ed ad ina vita claustrala severa. A l'entschatta aveva l'urden era numerus fraters laics che s'occupavan da l'agricultura e da l'artisanat. Durant ils emprims tschientaners devi era in urden da mungias premonstratensas. En Svizra è l'urden s'installà l'emprim al Lac de Joux en il Giura; las emprimas abazias da Humilimont e Bellelay èn vegnidas fundadas enturn il 1137. L'onn 1140 èn muntgs da quest urden probablmain vegnids a S. Gliezi/Cuira, nua ch'igl existiva già dapi il temp medieval tempriv ina communitad spirituala che viveva tenor reglas claustralas; attestada è la preschientscha dals premonstratens il 1149 cun il renviament a las reglas da s. Augustin. Prendi dimora han els probablmain sut l'uvestg Konrad von Biberegg ch'era in fautor da la claustra da premonstratens a Roggenburg en Baviera. Il 1209 appartegneva a S. Gliezi era la claustra da S. Hilari/Cuira ch'era situada sin ina terrassa da la vart sanestra da la Plessur ed en la quala vivevan mungias en clausura. A partir da S. Gliezi han muntgs premonstratens fundà a Curvalda sper la baselgia da S. Maria ina nova claustra. L'Augeria silva (gnaud d'ischis), sco quai che la regiun da la Val Curvalda vegniva numnada da quel temp, era ina vasta cuntrada da gnaud situada sin territori dals signurs de Vaz. En quest lieu han ils premonstratens cumenzà a runcar il gnaud, urbanisar il terren, introducir la cultivaziun dad ers ed a segrir e promover cun lur ospizi la via vers sid (Via Sura). La lavur da runcada era l'ovra dals fraters laics e da purs subdits e purs libers ch'eran sa mess sut la protezzion da l'immunitad claustrala. A Curvalda existiva oriundamain durant ca. 100 onns era ina claustra da mungias.

L'onn 1206 han muntgs da Curvalda fundà a Turirtg la claustra da premonstratens da Rütli ch'è sa sviluppada en il temp medieval tardiv ad in dals centers economic impurtants. A partir da Curvalda han els era fundà il 1222 la claustra da S. Giachen a Claustra. Il lieu entadim il Partenz sa numnava quella giada simplamain S. Giachen en il gnaud (in silva), quai ch'è in'ulteriura cumprova che la colonisaziun per propi ha cumenzà en quest lieu pir cun la fundaziun da la claustra. Sco en la Val Curvalda han purs rumantschs runcà e colonisà quest territori; da quai dattan perditga ils numerus numms rumantschs da lieus e cultiras. Pir en il decurs dal temp medieval tardiv è vegnida integrada en il process da colonisaziun era glieud da lingua tudestga.

Ils temps da fluriziun da l'urden dals premonstratens èn stads il 12avel ed il 13avel tschientaner, cura che lur members sa distinguevan tras lur fervenza religiosa e lur activitads per la furmaziun da la cuntrada. La crisa agricola ed ina morala per part degressiva durant il temp medieval tardiv han mess plaun a plaun las claustras en ruina. Durant il temp da la reformaziun èn vegnidas serradas tranter il 1525 ed il 1530 la claustra da Rütli



La baselgia da s. Gliezi a Cuira furmava antruras ina claustra da premonstratens.

e trais claustras en il Giura ed il 1548 era il convent a Claustra. A partir dal 1536 è la claustra da Curvalda ida pli e pli en decadenza. En il decurs da la Revoluziun franzosa èn alura vegnidas schliadas las davosas claustras da premonstratens, tranter quellas il 1797 Bellelay e Grandcourt, il 1804 S. Gliezi/Cuira ed il 1807 Curvalda.

Martin Bundi

Son Gliezi

Baselgia ed anteriura claustra da premonstratens a Cuira. Dal temp medieval tempriv n'existan naginas funtaunas segiras davart la baselgia, da la quala ins aveva engulà già avant l'onn 821 las reliquias da s. Gliezi. Enturn l'onn 800 para d'avair existì a Son Gliezi ina congregaziun che viveva tenor las reglas claustralas e che manava ina scola da spirituals. Era il scriptori curretic dal temp carolingic sa chattava probablmain a S. Gliezi. Il 1149 èn attestads premonstratens ch'eran sa domiciliads probablmain pauc avant a S. Gliezi. Lur convent era ina filiala da Roggenburg en Baviera ed appartegneva a la provinza svabaisa da l'urden respectiv. Il preses cumpara l'emprim sco priur, il 1156 sco prevost ed a partir dal 1186/91 sco avat, malgrà ch'il chapitel general aveva conferì pir il 1453 a la claustra da Son Gliezi il status d'ina abazia. Durant la reformaziun è vegnì executà il 1529 l'avat Theodul Schlegel e la claustra è vegnida messa sut curatella da la Lia da la Chadé. Il 1539 èn ils bains claustrals vegnids attribuids sco feuds ereditars als vischins da

Cuira. Il convent è s'exilià a Bendern/FL, nua ch'el è sa reduci a paucs commembers. Las stentas energicas interprendidas da vart da la Chasa Habsburg per restituir la claustra han pussibilità il 1636 il return da quella a S. Gliezi. Suentar la dissoluziun dal convent il 1806 è sa domiciliada ina congregaziun da redemtorists da Babenhausen (Baviera) a S. Gliezi. Suentar lur exiliaziun è ida la baselgia il medem onn al Seminari da spirituals bandischà da Meraun.

Il possess da S. Gliezi era concentrà a Cuira (chasas, curts, prada, vignas), en la Val dal Rain da Cuira, en il Scanvetg ed en la Val da Curvalda; ultra da quai aveva S. Gliezi era possess pli lontans (Bendern, curt a Rankweil/Vorarlberg e.a.). A la claustra da Cuira era annectà il convent da mungias da S. Hilari, menziunà il 1209 e per la davosa giada il 1347. Daspers sa chattava la chaplutta da S. Antoni, documentada a medem temp sco possess da S. Gliezi, cun ses ospital per leprus. Il 1154 ha attribui l'uvestg in ulteriur ospital da Cuira a la claustra, numnadamain quel da S. Martin. Vers la fin dal 14avel tschientaner ha alura surpiglià la citad da Cuira o madus ospitals. A l'attribuziun dal 1154 appartegneva la baselgia da l'anteriura claustra da mungias a Mistail. Il 1282 ha la claustra stuì barratar quella, ensemen cun la plipart dal possess respectiv, cunter la baselgia episcopala privata a Sagogn. Il 1156 ha affidà l'uvestg la direzzion dal convent da canonissas a Cazas ad in priur da la claustra da S. Gliezi, promovida oravant tut dals signurs da Belmont ch'avevan là lur fossa. La baselgia da S. Gliezi sa basa sin ina memoria da s. Andrea dal quart tschientaner tardiv. Da l'edifiziu carolingic cun sala a trais absidas (proablmain da l'emprima mesadad dal 8avel tschientaner) è sa mantegnida sulettamain la cripta (emprima mesadad dal 8avel tschientaner), destinada a la veneraziun dal patrùn. La chombra sepulcrala annexa (l'uschenunada chombra d'Emerita) para d'esser pli giuvna. Chats da fossas conferman la funcziun da Son Gliezi sco baselgia sepulcrala dals Zaccos/Victorids. L'edifiziu romanico ha vivi il 1252 la translocaziun da las reliquias da s. Gliezi, rescuvertas il 1108, il 1295 ina reconsecraziun en onur dals ss. Andrea e Gliezi, da la s. Emerita e da Numnasontga. Suentar reconstrucziuns da la baselgia e

da la claustra en il temp gotic tardiv, han ins cuntanschi il 1811 cun l'auzament da l'entir complex il stadi architectonic actual.

Florian Hitz

Son Hilari

Anteriura claustra a Cuira, situada sin la spunda dal Pizokel sur il Sand, tudestg Sankt Hilarien. La baselgia è probablmain vegnida erigida enturn l'onn 700 (u pli baud?) e sa chattava dador la citad. Ella è attestada pliras giadas enturn l'onn 800 sco Furtunes, il posteriur lieu da la claustra ed anteriur lieu da pelegrinadi. Enturn l'onn 830 era ella in bain roial, regalà l'onn 958 da l'imperatur Otto I, ensemen cun la curt, a la curia episcopala. Il 1150 è la claustra vegnida occupada da mungias premonstratensas sut la direzzion spirituala da S. Gliezi. Il 1209 è passada la baselgia a la claustra da S. Gliezi. Attestada la davosa giada il 1347, è S. Hilari alura vegni bandunà e schlià sut l'influenza da la reformaziun. Il 1538/39 èn ids ils bains da S. Hilari sco feuds ereditars als burgais da Cuira, pli tard a privats. Dapi il 1899 appartegna la baselgia da S. Hilari al Seminari da spirituals S. Gliezi.

Adolf Collenberg

Curvalda

Veglia abazia premonstratensa (prepositura fin il 1446) en la vischnanca da Curvalda. Filiala da l'abazia da Roggenburg (Baviera). Claustra-mamma da S. Giachen/Claustra e fin il 1230 da Rütli/ZH, provinza (circaria) da Svevia. 1149 in silva Augeria, 1191-1275 de Curvalde. Patronis: S. Maria e S. Mitgel. L'abazia, fundada enturn il 1150, è vegnida bandunada suenter la reformaziun e serrada uffizialmain il 1803/07.

La fundaziun legendar da Curvalda tras ils baruns de Vaz para plausibla. Ils de Vaz, donaturs principals da la claustra, eran avugads ecclesiastics e vegnivan inhumads, sco quai ch'ina exchavaziun dal 1968 cumprova, en la claustra. Lur successurs èn stads ils conts von Toggenburg fin il 1436, alura ils von Montfort fin il 1466/70, ils von Matsch tranter il 1471 ed il 1477 ed ils de Habsburg-Austria a partir dal 1477. Il coc da la donaziun, la baselgia da Nossadonna, appartegneva il 1149 già a l'abazia da S. Gliezi/Cuira. Ina revolta dals confrars laics para d'avair provocà il 1208 la partenza dal prevost e da ses fidaivels sco era la fundaziun da la

prepositura da Rütli. En ils onns 1208 e 1311 èn attestadas canonissas a Curvalda; la baselgia da S. Maria e S. Clau, construïda en il 13avel tschientaner sco successura da la baselgia da S. Maria dal 1149, vegn attribuida a quellas. Ses chor flancà da duas turs ha conferì a la baselgia in aspect caracteristic e visibel fin vaden il 19avel tschientaner. A partir dal 1210 ha Curvalda possess in ospital cun in'atgna chaplutta. La baselgia dal convent dals canonis, deditgada a s. Mitgel (pli tard a s. Maria e s. Mitgel) ed erigida en stil romanico enturn il 1250 var 250 m al nord da la baselgia da S. Maria, è daventada victima d'in incendi il 1472. Ella è vegnida remplazzada tras la baselgia-sala anc oz existenta, construïda en stil gotic tardiv e consecrada il 1502. Ils altars cuntegnan retabels da la Germania dal Sid e las picturas muralas èn attribuidas al Maister da Vuorz. La chasa annexa da l'avat, construïda en furma da tur, datscha dal 15avel tschientaner. Il 1527 ha il cumin da Curvalda, ch'aveva adoptà parzialmain la cretta reformada, avugadà e confiscà ils edifizis da l'abazia ed alienà ses bains. Il 1536 aveva Curvalda mo pli in avat titular (senza convent) ch'è vegni substituì il 1600 tras in administratur, nominà da l'abazia-mamma da Roggenburg ch'aveva era surpiglià ils debits creschents da Curvalda. Suentar la dissoluziun da Roggenburg il 1803 èn ils bains patrimonials restants da Curvalda passadas al Seminari da spirituals S. Gliezi/Cuira ed il 1877 da quest a la plaiv catolica da Curvalda.

La culegna en la Val da Curvalda, che s'extendeva dal nord da Malix fin a Parpan, era sortida da l'urbanisaziun promovida tras la claustra en il 13avel tschientaner. Documents cumprovan ch'ella aveva oriundamain era possess en la Tumleatsta, en il Scanvetg ed en la Val dal Rain da Cuira sco era auters, main impurtants, a Vaz ed en la Val d'Alvra. La claustra era sa separada suenter pauc temp da la plipart da ses emprims acquists en la Rezia Sut ed ella aveva adina in'atgna economia cun atgnas alps. Ils possess pli lontans ils pli impurtants eran las migiurias a S. Margreta/Cuira, Maivilla ed Altenstadt (Feldkirch). La giurisdictiun bassa abaziala è stada probablmain ina da las premissas fundamentalas per la creaziun dal cumin da Curvalda. Enturn il 1500 consistiva la plipart dals bains claustrals da feuds purils ereditars, entant che Curvalda aveva concedì paucs decennis pli baud feuds liads ad in contract da fitanza (tudestg Schupflehen). Malgrà ils sforzs constants dals servs claustrals per meglierar lur status giuridic, han subsistì restanzas da sclavitid fin a l'entschatta dal 16avel tschientaner.

Florian Hitz

Claustra-Serneus

La prepositura dals premonstratens da S. Giachen, fundada sco filiala da Curvalda tranter il 1208 ed il 1222, legada ed avugada probablmain dals baruns de Vaz, aveva il domini feudal sur ils abitants da Claustra. Il 1482 è vegnida incorporada la baselgia parochiala da S. Luregn a Saas en la prepositura da S. Giachen, schliada durant la reformaziun il 1526. Il medem onn è il possess da la claustra vegni secularisà e transformà en in bain-pravenda. En la part al sidost da la baselgia parochiala evangelica (anteriura baselgia claustrala) han ins chattà fastizs probabels da la claustra.

Florian Hitz



Paders premonstratens en in codex da ca. 1500.

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.